

Dialogoog

n verhoal ien t Grunnegers deur Be Kuipers

- Goeidag moeke, hou gait t mit joe?
- Heden nog tou, komstoe doar weer ais aan wicht. Dat wer ook wel es weer tied, ik zai die hoast nooit meer. Hestoe t zo drok?
- Ach moeke, ik was hier veurege week ook nog ja, wait ie dat nait meer?
- t Is aal kwait n' hou laank leden dat ik die zain heb. Doe koms hier ja hoast nooit.
- Joawel heur.
- Nee nooit!
- Zel ik den vot mor weer votgoan moeke? Zo vien ik ter niks aan, aal dat gemotje...
- Hmmm...


- Hou gait ter mit?
- t Gait wel heur. Dokter is tevreden, zee e lestdoags. Nou en den ben ik t ook. Mor lopen wil nait zo best meer, mien bainen he... Ze bennen te dik en zit gain kracht meer ien, zee dokter. Aankom week mout ik weer noar hom tou. Eerst mor ais ofwachten wat of e wil.
- Kom ie der nog wel ais oet?
- Nee, ik blief mainstied op mien koamer.
- Mor kommen der wel mensen bie joe, aander bejoarden van t hoes, vrunden, kenizzen?
- Nee, nooit. k Heb vandoag mien bek ook nog haildaal nait lös had.
- Nah... wat n proat. En dat zel toch wel wat mitvalen, personeel komt toch ook bie joe?
- Nou ja, personeel, dij hebben t altied zo drok, dij hebben gain tied veur n proatje.

- As ie zo min lopen kinnen is n rollator den nait wat veur joe?
- Rollator? Wat mout ik doarmit?
- Nou, der mit lopen vanzulf. Den krieg je wat steun.
- O, mor ik huif gain steun heur. Ik heb n stand op miezulf en huif nait op n aander te steunen. k Heb mie mien haile leven zulf redden kind en dat wil ik nou ook geern.
- Nee, ik bedoul, mit n rollator heb je wat steun bie t lopen. En den kin je mooi aargens hen goan.
- Ik goa nooit naargens hen. Ik heb t hier goud en hier wait ik wat ik heb. Ien boeten of bie n aander is t haitied nog mor ofwachten, t is zo'n roare wereld tegenwoordeg.
- Nee, dat bedoul ik nait, ie hebben ja last mit lopen, zeden ie.
- Joa, t lopen wil nait best meer. Mor ik mout eerst ofwachten wat of ze willen mit mien bainen. Meschain mout ik wel noar t zaikenhoes veur onderzuik.
- Nou, den kin ie ientied toch best n rollator nemen?
- Joa, mor dij heb ik ja nait.
- Nee, mor dij kin je wel kriegen heur.
- Kriegen? Kost dan den gain geld? Ik ben zuneg op mien centen, ik geef niks oet aan onnutte dingen.
- Mor n rollator is toch nait onnut? Kinnen der veul makkelker mit lopen heur.
- Mor ik kin haildaal nait zo best lopen. En hier, ien t tehoes en op mien koamer, is zo'n ding veuls te onhandeg.

- Mor den kommen ie der zo ja nooit n moal oet.
- O, dat vaalt mit heur. Ik ben guster nog noar Rika west, dien taande. Dij woont n poar verdaipens hoger en ik mos mit lift.
- En ben ie doar zulf henlopen?
- Nee..., mit lift, zee ik ja. Ik woag mie nait op trappens.
- Ik bedoul, bennen ie doar haildaal zulf lopend hen west, dou ie te lift oetkwamen?
- Nee, bizzo gek. Ik durf nait allain ien lift, zo'n klaine ofsloten roemte zunder roamkes. Den

- wor ik altied hail benauwd, of ik ien n celje zit. Der mout altied ain mit mie mit ien lift, ook om op knopkes te drukken, want doar heb ik gain verstand van. En zodounde goa ik nooit allenneg mit lift.
- Gait ter den n zuster of n broeder mit joe mit?
 - Woarhen?
 - As je mit lift goan?
 - Nee..., dij hebben t ja zo drok. Mor ik goa nooit allenneg mit lift, ik ben baang ien lift. Is lest-doags n vraauw mit lift haalfweg stoeken bleven. Zai het ter n haile middag ien zeten veurdats ze heur der oet kriegen konden. Vrezelk liekt mie dat tou.
 - Mor hou bennen ie den bie taan' Rika kommen?
 - Mit lift ja, doar haar ik t net over. Mor ik duurf der nait alenneg ien, der mout altied ain mit mie mit.
-
- Hou was t mit taan' Rika?
 - Goud, allain t lopen wil nait zo best.
 - Wat apart, dat ze ook hoast nait lopen kin.
 - Joa, mor zai het n rol... dingeraais. Hou hait dat ook weer?
 - Rollator.
 - Joa, zai het n rollator en kin heur der oardeg schier mit redden.
 - Niks veur joe?
 - Wat?
 - Zo'n rollator?
 - Oh nee. Wat mout ik doar ien vredesnoam mit?
-
- Heb ie nog n beetje oaventuur hier ien tehoes moeke?
 - Och, ik heb vanalles te doun. Ik ben aan t handwaarken, dikke wollen zokken braaien veur klainkiender veur van t winter, klaidjes hoaken, borduren en aal zukswathen.
 - Heden ja, wat bennen ie doar n mooi rond klaidje aan t hoaken moeke.
 - Joa, mor ik kin nait wieder, ik ben mien hoaknaal kwiet. Ik denk ik hom valen loaten heb en dat e aargens op grond ligt. Mor ik kin t nait zo goud meer zain, t is n lutjeke. En zo daip bukken kin k ook nait.
 - Den vroeg ie ain van personeel toch even?
 - Dij waiten toch ook nait woar of e ligt. En zai hebben t ja aingoaal zo drok.
 - Woar heb ie hom verloren, denk ie?
 - Ik zit altied bie etenstoavel te hoaken. Hai zel doar wel aargens onder toavel liggen.
 - Wacht, ik kiek wel even.
 - Nee..., nait hier bie t roam, doar ligt e nait.
 - Joa, mor hier kin ik t wel veul beder zain.
-
- Wat is der wicht, bistoe kwoad op mie?
 - Welnee, hou kom je der bie moeke, ik kwoad op joe?
 - Wel woar, doe bis kwoad op mie, waarom bistoe kwoad op mie?
 - Ik zeg toch dat ik nait kwoad op joe ben.
 - Joawel heur, ik heur t aan dien stem.
 - Moeke, ik pebaaier juist om nait kwoad op joe te worden, mor ie moaken t mie nou wel haile stoer.
 - Kiek, zigs nou wel, doe bis kwoad op mie. Woarom? Woar heb ik dat aan te danken. Mien haile leven heb ik veur die zörgd en altied ston ik veur die kloar, altied ales oet gouders best. Mor doe bis aingoaal kwoad op mie.
 - Dag moeke, tot n aander moal mor weer.

Sinds 1 juli Groninger verhalen 'los' online

 www.contactblad.info/groningerverhalen.html